

欽
定
全
唐
文

欽定全唐文卷四百五十一目錄

新文藝出版社藏書

喬潭

霜鐘賦 有序

素絲賦

裴將軍劒舞賦 有序

羣玉山賦

秋晴曲江望太一納歸雲賦

破的賦 有序

雙漢泉賦

饒陽縣令廳壁記

會昌主簿廳壁記

中渭橋記

女媧陵記

皇甫冉

謝賜冬衣表三首

送陸羽之越序

氏引繹引之於手如皓鶴之飛承之以筐若凝霜之積旣
而嬪婦化理經緯縱橫當軒兮婀娜之織弄杼兮軋軋之
聲映羅袖而增麗度金梭而轉明每知白以自守亦含章
而可貞夫以白能受采文匪勝質故公孫戒於從微墨翟
悲其患失青爲纆兮非擬朱爲繩兮未匹珍蠶恥越鄉而
來獨繭嗟自園而出唯彼蚩蚩之喻無愧皎皎之實乃續
曰絲之素兮貞且吉人之質兮清且一若見用於當時寧
七襄於終日

裴將軍劒舞賦

有序

元和秋七月羽林裴公獻戎捷於京師上御花萼樓大置酒酒酣詔將軍舞劒爲天下壯觀遂賦之其詞曰

將軍以幽燕勁卒耀武窮髮俘海夷虜山羯左執律右秉鉞振旅闐闐獻功於魏闕上享之則鐘以悍簾鼓以靈鼉千伎度舞萬人高歌秦雲動色渭水躍波有肉如山有酒如河君臣樂飲而一醉夷夏薰薰而載和帝謂將軍拔劒起舞以張皇師旅以烜赫戎虜節八音而行八風奮兩階之干羽公於是乎貝胄朱綬而作色虎裘錦褱而攘臂抗稜威飄銳氣陸離乎武備婆娑乎文事合桑林之容以盡

其意照蓮花之彩以宣其利翕然鷹揚翼爾龍驤鋒隨指
顧鏐應徊翔取諸身而聳躍上其手以激昂縱橫耀穎左
右交光觀乎此劒之躍也乍雄飛俄虎吼搖輓轡射斗牛
空中悍慄不下將久歎風落而雨來累愜心而應手爾其
陵厲清浮絢練夏絕青天兮可倚白雲兮可決覩二龍之
追飛見七星之明滅雜朱干之逸勢應金奏之繁節至乃
天輪宛轉貫索迴環光沖融乎其外氣渾合乎其間若湧
雲濤如飛雪山萬夫爲之雨汗八佾爲之慙顏及乎度曲
將終發機尤捷或連翩而七縱或瞬息而三接風生兮猜

施檐檐雷走兮彤庭煜煜陰明變見靈怪離獵將鬼神之
無所遁逃豈蠻夷之不足震懾嗟夫蘭子之迭躍其技未
雄仲由之自衛其舞未工豈若將軍爲百夫之特寶劔有
千金之飾奮紫髯之白刃發帝庭之光色所以象大君之
功亦以宣忠臣之力或歌曰洸洸武臣耀雄劔兮清邊塵
威戎夷兮率土來賓焉用輕裾之妓女長袖之才人天子
穆然詔伶官斥鄭衛選色者使覘乎軍容教舞者俾觀乎
兵勢激楚結風發揚蹈厲僉謂將軍之劔舞古未之制

羣玉山賦

以廓功峻登道
招外遊爲韻

穆王與偓佺之倫爲玉山之會乃御雲輦張華蓋飛龍騃
騃和鑾噦噦警清蹕傳虛籟忽兮迢遙漫若天外於是乎
徙倚西望逶迤北遊梁弱水跨瀛洲析若木以爲珮采琅
玕以爲羞俾幽荒窮僻有車轍馬跡經銀臺而右轉肆玉
軌以東適停羽儀乎此中觀仙聖之圖籍旣而浮莽蕩躋
峻嶒神靈儼其高會容衛紛其上騰若光若滅賁然來登
觀其亭亭太虛不可彌度石室靈造玉堂天鑿寶牒有融
仙經惟錯蕩青簡兮綠字煥瑤緘兮金絡璫以蚪龍拂之
鸞鶴爲列眞之策府亦太一之延閣覽之而羣聖會同拔

之而萬古昭廓且藏書爲寶鎮物爲雄小石林之峯峒陋
玉樹之青蔥赫臚臚高崇崇秘精義乎其中何必登隱弁
拜崆峒挹方壺而訪道歷秦望而爲功者哉至如窮地之
險極天之峻疊素九成攢花萬仞非神轡之六駿孰能倏
而驟進或歌之曰彼天子兮塵外鑣登靈臺兮意飄飄吾
君得道兮異於是不日求兮自逍遙以石渠爲羣玉之處
幸校文之見招

秋晴曲江望太一納歸雲賦

以題中字爲韻

秦稱百二鎮爲太一合沓橫空欽岑蔽日豈瓊寶之攸產

蓋雲雷之自出宜其密爾王旬雄茲帝京敗葉風警高秋
氣清時雨夕歇歸雲晚晴俯枕曲水前臨直城山半隱而
半見雲乍低而乍傾其趣可賞而不極其容可狀而難名
爾其沉陰始解靄霽初歸迴日猶重因風則飛其始也峩
峩巍巍千巖萬嶺稠疊而相感其漸也紛紛霏霏齊童趙
女並舞而垂衣忽天澄而地廓鬱氛氲于翠微別有容與
之勢輕盈之狀日下空籠天邊引颺始悠悠於綠野漸羃
羃於青嶂洛川神女何以踰巫峽佳人不能上雖更僕而
非久仍移景而堪望落日將曛山銜斷雲綠氣陰鬱嵐光

氤氲橫截高巖驚數峯之頓失却臨幽石與殘雪而無分
乃爲歌曰節彼南山兮人所矚施此雲雨兮濟君欲信軌
物之無憊奚百姓之不足徘徊不去乃賦歸雲之曲曰歸
雲之狀兮不一歸雲之趣兮難傳雲不以朝晡而異賞士
不以前後而異求誠在位之如是知夫鴻漸之高秋

破的賦

有序

君子修辭以干祿祿或不至居常以俟命感而遂通抑亦
莊生不射故爲破的賦以喻其詞曰

飛衛學射於逢蒙希其術窮搜董蒲白羽之箭獲燕角綠

沉之弓悵望隴雲徘徊朔風以爲隼必獲於墉上雀無全
於殼中或曰人將觀德子盍呈功乃見於諸侯閱之州序
獻於天子臨乎澤宮自上而下陳其比偶歌騶虞奏貍首
其或少算從而進酒於是乎擇素士張畫侯韜朱膊捍韋
韞旣垂橐以弦弧亦啟箴而抽鼓內審其志外專其目釋
思其平去務其速落殘月於象弭飛明星於金鏃宜易易
而獲禽翻兢兢而失鵠師哂之曰殆矣王庭之賓胡爲先
利其器而不反求其身乃杜門三年猶乎家人聽之以氣
視之以神秋毫女山蝨心如輪高其小物申以歲貢從容

君所無復命中不知矢之所加弦之所控不知引之而滿
縱之而送以無心爲心若夢不夢斯焉而遽發驕然而通
洞洞之者是爲中的中之者細若毫芒乃能匪左匪右不
留不揚絕心乎後牢落判散亦何有四方是時也君子觀
之貴其得一小人視之多其中質九賓之衆毛豎骨驚陰
幽鬼神股戰顙慄固可使朝肅慎面先零變幽都柔南溟
至遠無外罔不來庭夫以有形之器猶能破的況天機爲
弧大直爲矢而不能破其夷狄故事無矜功理在冥跡不
射乃師之益吾將爲益

雙漢泉賦

以泉水澄徹皎
鏡春冬爲韻

呀厚地而濫涌者有河東之漢泉
坼陰開竇沃日浮天初
泊沒圓衝沸高湍於柔祇之下
復逶迤遠注散餘波於馮
夷之川爲神龍窟宅之上而致美爲陰陽蓄泄之所而通
元將海日泓沍而昭此豈坤儀挺拔以隳焉來何所以去
何所止始開雙漢發輝於汾魏之郊竟助洪流歸潮於渤
澥之水借如夜色初升空光下凝繁星映而珠滿新月入
而鈎澄泊乎風駭霧散烟涌雲蒸則有鬼神倏閃以恍惚
蛟螭鼓怒以噴騰物之與詭怪孰可得而備徵意以爲潛

虛洞決脈流派別雖一河有隔終陰隲以相連故數眼分

開涵碧虛而共潔

未見澈字官韻

是以百尺澄兮四空晶珠胎明

兮沙岸皎洗沸烟埃蕩漾魚鳥亦能涼生朱夏氣暖元冬

守謙下以含道順畎澮以利農道則以物爲賓水則假利

於春人有情以利水水無意以求人人之自僞我豈非真

故至人以水爲德以心爲鏡鏡雖明不利於人水至平不

潛乎性故漢之爲澤也廣泉之爲鑒也淨若壅而閉則澤

不能及物混而濁則鑒不能自正故選士者象清漢以含

虛懷才者但明心而未映苟能酌憲於茲泉則可以相鹽

梅而翼聖

饒陽縣令廳壁記

千里之外設方伯帥其屬屬有長今之縣尹焉故縣之庶
富尹以賢傑不可冗而庸也自齊桓匡合制我饒陽歷戰
國以還遂美其城邑西邇全趙東拒河間燕之南郊冀之
北土其有呂尚之遺風乎多奇士好帶劒侈服多佳人善
彈弦踔躑其地虜口近擊柝之虞其川滹沱有泛舟之役
廣輪七十里編戶二萬計行或擊轂市或駕肩日中奇贏
雜弊爲寐機女狹其幅利染工多其姦色業不可廢訟由

是興非夫寬猛以濟之則不能用又宵人課居異政固亦明已我茂宰裴公河汾鼎族公卿門子識經之文緯之教纔設而耆幼歸心刑不施而權豪斂跡惠行爲膏雨令出爲清風君子謂裴公於是乎君子其高蹈近密翰飛清冥未可涯也余味之久矣豈縣公能事而屋壁不書召彼故老詢於前政莫知其數遠者闕如權輿先天置郡之後凡名士改轉列于左偏庶幾將來亦克用勸

會昌主簿廳壁記

會昌行在也新邑作焉主簿糾曹也我公吏焉公名摯字

某由秘書正字而拜初蒙泉秘湧於山下陰火潛燃於地
中是開湯池以御宿獲靈符之三載有詔留之冠新豐渭
南而爲畿縣以明年復詔廣之齒萬年長安而爲京邑非
良才無以紆劇非美誠無以鈞賢邑改其名官遷其秩宜
矣北陸寒苦東郊豫遊萬乘入郭百司在宇溫泉之宮齊
乎下集靈之臺禱乎上物或過求難於抱影事或倚辦急
於奔星雖務分官聯而我實綱紀編王侯於尺籍惣豪猾
於伍符皆此之自闕疑以簡書追胥以簿書詰盜皆此之
自決縣大夫無能專達野司寇不獲僅成咸在公之鈐鍵

矣不言而政每游刃不速而人常應弦申之以豐盈甚都
加之以藻麗尤絕非鄭桓公之邁德不存孝孫非少宗伯
之允文不有令德籲懷茲邑必復康侯進吾往也夫仰東
井倉期天帝山木冬繁其浴日之溫流乎水雲晝積其濯
龍之靈液乎矧乃才之甚器之甚游泳恩波膏沐聖澤將
濯軒拖紅顧盼千里豈俟辭蒲而階漸我君子謂是言也
潭忝以詞賦見知春官欽惟教忠即簿領之能事敢序施
政有門人之直詞乙酉歲抄志於南軒之東壁誰謂來者
不承乎權輿

中渭橋記

自鳥鼠穴者茲水廣矣依鳳凰城者茲橋壯矣水朝巨海而不竭橋通大路而居要不然豈自秦至我唐六千甲子而猶存也稽厥宏造率茲帝圻候天根之見當農務之隙司金司木鳩而積也水工木工速而至也揮刃落雪荷鍤成雲京兆尹紫綬而董之邑吏墨綬以臨之遠邇子來結構勿亟無小無大咸稱天休經之營之不愆於素丹柱插於坎陷朱欄赭而電炫乃虹引成勢猶崔嵬就功連橫門抵禁苑南馳終嶺商洛北走滇池廊時濟濟有衆憧憧往

來車馬載馳而不危水潦起漲而轉固人思啟行吾其能
濟赭赭赫赫轟轟闐闐且周穆之駕黿鼉振千祀也東明
之聚魚鼈稱一時也孰若我由之而必達憑之而必安若
以匹敵夫何遠矣潭遂因行邁覩茲崇飾將刊石以表跡
敢搦札以記事赤奮歲流火之月也

女媧陵記

登黃龍古塞望洪河中流巋然獨存大浸不溺者媧皇陵
也夫巨靈擘太華蹠首陽導河而東以洩憤怒雖有重邱
大阜險狹之口罔不漱之爲黃壤汨之於旋波不可復振

奔崩而下矣女媧氏已然之後豁爾之衝天險東阨風濤鼓作乃能中乾外禦特立萬年其憑神可知也水無盈縮之度陵有高卑之常霖潦漲之兩涘沒矣於是乎不爲之小而就其深旱暵滲之孤嶼出矣於是乎不爲之大而就其淺非夫巨靈壯趾以固本河伯高肩以承隅胡然動靜如因其時升降不失其則羅浮二岳以風雨合離蓬萊五山以波濤上下不復故道遂違常流甚相遠矣君子曰夫能屠黑龍涸九州況乎一水之上而自爲謀夫能斷鼇足立四極況乎數仞之高而自爲力神人之異昧者難知密

邇山谷森羅物象莽莽蘆渚寧非止水之餘嶄嶄石林猶
有補天之色搖演空曲精靈若存且夫上無積草表以孤
樹常感風氣纖條悲鳴若冥應盱嚮鼓簧而吹笙由是憧
憧往來無不加敬山有梅栗關吏羞焉水有菱芡舟人莫
焉冢之木無或斬焉陵之土無或抔焉是則馨香已陳而
樵蘇自禁矣故聖人取薄葬去厚送驪山之銀海魚燈虎
邱之金精龍劒錮之其內散之其間適爲大盜之守未足
藏身之固彼橋山帝邱九疑會稽皆因山而墳未聞其赭
者余謂媯皇受命在火火以示水谷不爲陵開門負固日

用其力不然其隙地豈必封崇乎是故觀而志之爲城豕
後記

皇甫冉

冉字茂政天寶中進士授無錫尉王縉帥河南表掌書記
累遷右補闕

謝賜冬衣表 三首

臣某言中使某至伏奉敕書手詔賜臣及兵馬使都虞候
冬衣各一副拜受綸言跪承珍服荷同山岳懼比冰淵臣
某中謝臣功微草芥寄重藩條每懷尸祿之羞實負曠官

之恥豈謂天文迴照不隔於遐方御府頒衣更蒙於陋質
傍沾偏將曲被殊私挾纊既及于三軍酬恩將期于萬死
無任云云

二

臣某言伏奉聖恩賜臣冬衣四襲跪捧驚喜抃躍交馳臣
某中謝臣功效微薄任遇寵榮使降專人衣裁御府寵光
既極恩已及於解衣雨露既濡德又承於挾纊實亦發輝
陋質煥赫私門未知此生何以仰報謹當訓勵師旅式遏
邊陲用宣力於百身酬鴻私於一顧無任云云

三

臣某言某月日中使某至伏奉敕書手詔並賜臣冬衣一襲者清風早至白露初凝方思挾纊之溫忽報頒裘之禮跪拜受服形魂惕然臣某中謝臣學非博古才不動衆幸逢開泰列在方隅天高地厚未知所答而時雨霑洗太陽照燭王人捧詔每降於上天御府賜衣不遺於下土既其輕暖加之麗密束帶而立周旋有光驚寒沍之難侵荷威靈之曲被無任云云

送陸羽之越序

金少子
卷之三
君子窮孔釋之名理極歌詩之麗則遠墅孤塢通舟必行
魚梁釣磯隨意而往夫越地稱山水之鄉轅門當節鉞之
重鮑侯知子愛子者將解衣推食豈徒嘗鏡水之魚宿耶
溪之月而已

欽定全唐文卷四百五十二目錄

邵說

筌蹄賦

爲郭令公賀南郊大禮表

讓吏部侍郎表

第二表

爲郭子儀讓華州及奉天縣請立生祠堂及碑表

第二表

第三表

第四表

代郭子儀謝副元帥河中節度使表

代郭子儀謝兼河東節度使表

代侯中莊謝封表

爲王仲昇謝加兵馬使表

爲郭令公謝一子三品官表

爲文武百僚謝示周易鏡圖表

爲郭令公謝臘日賜香藥表

謝賜新曆日及口脂面藥等表

謝墨詔賜厯日口脂表

爲田神玉謝端午物表

代郭令公請雪裴僕射表

代郭令公請雪安思順表

上代宗書

上中書張舍人書

唐故同州河西縣丞贈虢州刺史太常卿天水趙

公神道碑

并序

欽定全唐文卷四百五十二

邵說

說相州安陽人天寶中進士爲史朝義判官朝義敗降郭
子儀累授長安令秘書少監遷吏部侍郎太子詹事建中
三年坐爲朱泚草奏訟嚴郢寃貶歸州刺史卒

筌蹄賦

至道元默真宗樸素莫究其源孰知其故將假物以明象
乃忘言而立喻若筌在魚若蹄在兔苟或藪澤之內以時
而肅設溪澗之間應節而周布乃凌岑壑忘蹄與筌興言

薄狩命駕忘旋魚潑潑以隨波樂只兔爰爰而得性怡然
好之者徒發嘆於終日觀之者空起羨於臨川斯無虞於
即鹿寧有望於烹鮮於戲道有興廢時有通塞羨魚如之
何匪筌不得逐兔如之何匪蹄不克猶蹄在兔兔既獲而
蹄可以忘猶筌在魚魚既烹而筌可以息亦何異遊道藩
者揮郢匠之斤御道樞者削公輸之墨彼損之而又損故
不得而有得是以聖人立教所寶惟真勤求若喪之旨遠
索忘言之津還淳返樸求於道要絕聖棄智無爲實賓故
卓立政始輝光日新夫子將欲論筌蹄於宜觀盍若考前

途而後遵

爲郭令公賀南郊大禮表

臣某言伏承今月二日冊皇太子六日朝獻太清宮七日
享太廟八日有事于南郊者欸謁宮廟尊崇祖禰展敬天
之禮百神受職宏主鬯之義萬國以貞率土之濱孰不忻
戴臣限以出鎮闕覩盛儀仰白日以心馳望赤墀而手抃
無任歡慶之至

讓吏部侍郎表

臣某言臣以殃釁頃遭汚染知臣者或哀其逼切畏忌者

或肆其讒誣自授南宮分銓東洛于茲累月憂懼實深火
心水背若墜泉谷何則拜命之始遇山陵附近奉辭之日
屬虞祭未終不得入覲天顏少申誠慊此臣所以達曙不
寐終朝疚懷徘徊徬徨莫知死所今情有至切不敢不盡
陳其愚衷臣家本儒素代傳名節臣祖長白山人貞一以
周朝權統革命潛遁終身臣父殿中侍御史瓊之遇元宗
撥亂興邦數厯數四累登甲乙之第再踐準繩之任微臣
積釁殃禍所鍾十六而孤長於母手誓心墳史不出戶庭
迨至天寶年中謬忝詞場擢第適會老母棄背服喪河洛

及祿山之至禮制當終臣愚不脫縲麻更踰再歲而賊中
言議往往紛然臣懼兇黨不容寓遊洛魏值慶緒奔遁保
於相城大搜詞人脇爲已用以兇威責臣不至以驛騎逼
臣遂行與潘炎始陷兇逆遽聞思明款附燕趙服從欲取
黃沙嶺路因此得歸闕下屬思明數萬之衆南鎮趙州送
臣於范陽抗疏以聞奏肅宗特降中旨授臣左金吾衛騎
曹將軍宣恩命示聞卿遠來可且於思明處憩息留滯未
幾忽遇烏承恩事彰由是井陘路絕再陷兇盜而思明朝
義負恩之際臣亦累達款誠伏蒙肅宗皇帝賜臣敕書云

卿志士苦心王臣勵節藝成俎豆跡陷豺狼頃年鄴中策馬歸命出於萬死臣節尤彰忠誠若茲不負於國比朝義將敗謀守河陽臣知回紇利於野戰沮破其計及朝義奔走臣得西歸伏死於闕庭獻狀於先聖中使特宣進止云卿之狀跡多肅宗時事三數日內即授卿官當蒙除臣延王府功曹參軍宣進止云卿所進狀見令在院及翰林檢勘至其年六月十九日與王伾同時召見先聖謂臣及王伾曰卿所進狀朕一一已令檢勘卿之誠節可謂著明尋除王伾侍御史除臣殿中侍御史仍遣宣進止中書門下

令制詞中盡言其事詞云王佑邵說有文學政事之資飾
溫良恭儉之行嘗應推擇薦屬流離失身淹時無路自免
然而深知逆順潛竭欵誠當慶緒之難已彰臣節及朝義
之敗更沮兇謀言念忠懇何傷黥污思申雅器且表至公
宜擢憲司式宏國體則先聖疇昔之意盡已知之自是再
忝栢臺四登郎署宰理京劇倅貳秘書一十八年備更任
使今復以非次待之不疑斯發自天斷非常情所及且棄
瑕錄用古昔攸難稽之載籍所傳無幾則齊桓諸侯之主
能收管仲太宗非常之聖特任魏徵咸爲得人終成大業

如臣行藝寡薄知識凡淺有殊管魏之事曾無管魏之才
必恐受謗於衣冠不容於輩列速愚臣之禍傷聖主之明
其理必然固無疑也古語曰女無好醜入宮見妬士無賢
不肖入朝見嫉臣雖掌銓日近切慮見嫉已深伏願哀臣
血誠免臣此職四門已穆百度惟貞在於微臣死生感戴
無任懇切之至

第二表

臣某言臣以玷缺懼辱高位一昨瀝肝上請泣血祈天冀
達愚衷俯停新命不謂聖慈衰飾宸鑒未迴伏讀墨詔載

深兢惕臣其中謝臣嘗覽載籍備知古今用人之道其流
不一遇艱難之際或有棄瑕偶文明之時固當慎擇如臣
頃陷兇逆大節已虧雖昔曾獻欵而罪難自贖今中朝無
事八表會同有符帝舜之理日漸時雍之化已明四目特
序九流豈臣污染之餘合受清通之寄縱使陛下憐臣宿
志察臣脇從無那取捨羣才易招毀黷亦安可家至戶說
令盡知愚臣疇昔之血誠哉何則今歲吏曹至難十倍常
歲缺員至少從調者多益之功優其數尤廣又準選格以
判留人十輩之中放其六七彼輩衣糧自遠旅食經時固

不甘心必大騰口脫有誣謗上疑聖心事等投杼將何取
雪此臣之懼敢不盡言況朝廷冠冕如雲咸稱俊傑或以
文行底祿或以政術知名出入中外累更任使而臣謬司
左職實用多慙伏見戶部郎中蕭定司農卿庾準才優識
遠望重一時伏望罷臣別授定等庶光朝選克辨人倫則
徐毛裴王復存聖代無任懇願迫切之至

爲郭子儀讓華州及奉天縣請立生祠堂及碑表
臣子儀言臣得同華州節度使華州刺史周智光牒稱得
耆壽薛遠等狀以華州是臣所生之地奏請與臣立紀功

頌德碑天慈曲臨已蒙聽許又得奉天縣令程暹狀得百姓仇廷珍及僧山海等狀亦請與臣立碑及生祠者伏以皇家受命祚運延昌雖妖孽暫興而天地終泰收兩京之際陛下親總元戎臣忝職驅馳躬執鞭弭指蹤逐寇皆聖主之雄圖靖難夷兇顧微臣而何力又奉天之役大挫渠魁亦仗天威以集戎事必欲紀之金石播美無疆理合昭宣聖功垂於不朽豈臣薄劣輒敢當仁寤寐兢惶莫知死所瘡痍之後凋瘵未平更屬春時實妨農業乞迴成命一切勒停庶老臣無貪天之責疲人有息肩之望懇欸迫切

之至謹奉表陳讓以聞

第二表

臣子儀言伏以華州及奉天耆壽等請與臣立碑及生祠
昨已奉表請停未蒙允納夙夜省度不勝戰悸臣某中謝
臣以孱庸謬承驅策雖東征西伐莫顧微軀而保大定功
皆憑睿算今欲刊諸貞石永播徽猷實爲貪天之功難勝
躋地之愧況今兵革未息瘡痍未平忽此勞煩必有妨奪
顧臣薄劣將何自安臣雖至愚深知不可再陳旒宸伏用
兢惶所望聖慈遂臣誠請無任懇迫之至

第三表

臣子儀言臣聞人臣事君稟命而已若君有非常之畧則臣成佐命之勲象彼四時運行實因於上帝配諸百谷廣大在宗於滄溟頃陛下監國撫軍則再安宗社及飛龍踐祚又克清夷狄所有成績莫匪雄圖臣雖在行何力之有今奉天華州耆壽請爲臣建碑立祠且陛下聖功已書簡策微臣薄效何足裒稱者艾之徒昧於事體謬請刊紀殊乖名實昨已再表懇辭冀達誠慊陛下未察令斷來章奉詔兢惶若墜泉谷況今畿內百姓日益凋殘糧無半菽室

如懸磬以不急之務擾至疲之人竊顧心顏益增覲懼又
比來耆壽陳狀是官吏指麾恐以臣備位台司妄爲希附
縱有勤請或由矯飾所祈聖造特遂愚衷區區之誠敢以
死請無任懇迫之至

第四表

臣子儀言伏以奉天耆壽等請爲臣立碑及生祠臣自揣
功業至薄不足以當刊紀百姓至敝不可以興力役厯獻
愚懇至于再三言不動天未蒙允納夙夜兢懼不遑寧止
臣非有馬援南征之績竇憲北伐之功安敢飾詞以陳謙

讓但以兵革不息十年于茲天下之人未獲其所臣幸備
相位尚負憂責頃歲之克復京都去冬之小却夷醜所有
微效皆稟聖謀然未能使其干戈盡銷郊甸罷警北有亡
命之虜西有無厭之戎公卿大夫未免盱食臣幸而獲宥
其榮已多豈可竊功僥名以圖不朽其若干古何昔漢爲
霍去病理第辭以匈奴未滅無以家爲況今殘孽尚存而
敢播美金石臣雖才不逮名竊慕古人之志所望再效駑
蹇遠斥兇渠三虜之首必懸四海之波自定從茲偃伯可
以息人然後紀功亦未爲晚臣以誠願實在於斯伏乞聖

恩特遂勤請無任惶怖懇迫之至

代郭子儀謝副元帥河中節度使表

臣某言伏奉今月日制授臣河東副元帥河中節度使寄
深匡輔任切安危寵命遄臨憂惶如灼臣某中謝臣智術
凡淺才畧無聞承日月之光偶風雲之會自奉先帝猷以
驅馳披甲即戎載懼寒暑比憑朝算克振天聲雖毫髮之
功曾無足紀竟不能掃蕩妖孽使八方攸同謬踐中樞仍
叨上將分茅錫土榮冠一時悽悽之誠竊自增愧今又猥
蒙驅策出鎮河中授臣以連帥之權委臣以專征之務雖

才輕方召而任此桓文此陛下除奸之時乃微臣死難之日竊觀自古忠義之士莫不扶危救禍憂國忘家雖在暮年猶思報主則廉頗強飯馬援據鞍以臣方之有甚前哲軍國重事不敢固辭誓竭股肱之力以副腹心之寄倘皇猷獲展寇難克平殞身戎行實無所恨無任感恩

代郭子儀謝兼河東節度使表

臣某言今日伏奉恩制授臣使持節都督雲州諸軍事兼雲州太守充河東節度度支營田大使大同軍使管内採訪使祇拜休命內揣薄才委任專崇周章失據臣某中

謝臣聞邊之安危係於所用事之成敗諒在先謀故寸璧
必求良工尺錦亦資善製況夫謀無智勇備列戎旃自守
封疆頗淹歲序肅將朝命翦滅兇徒此乃天功匪惟臣力
陛下不遺犬馬念以驅馳收其分寸之勞加以邱山之賞
禮因位重恩與日深常恐顛危不克負荷所以昨有陳讓
乞停范陽而手詔曲垂不蒙允許退就私室竊愧明時素
餐之詩自臣攸作今又更承獎命兼以河東邊境相連三
千餘里烽燧列警斥堠須明雖則居安終資有備以臣獨
制謂必無失然以能處一事身任一官猶擇其人且懼曠

職況臣旁綰三節控帶數藩智有所不周心有所不及兵權倘失奔駟寧追實慮授受乖宜簡書是畏望特矜臣不逮察臣愚誠更選良能付以旄鉞則樵夫絕議官序有倫臣無任

代侯中莊謝封表

臣某言伏奉某月日制授臣太子詹事兼封上谷郡王祇奉榮命以慙以惕臣聞論德而建封者聖王之事也量功而受賞者忠臣之義也封或謬建則王綱斯紊賞或虛受則臣體以乖聞之古先敢忘斯誠伏惟皇帝陛下大聖繼

統神武經邦道邁纂堯功高復禹頊幽燕肆逆汾澮阻兵
朝義叛渙於前懷恩旅拒於後陛下宸謨獨斷睿畧潛行
曾未三年克平二豎此蓋皇穹保佑宗社降靈豈臣愚蒙
敢叨封爵假使進能排難退克全軍爲臣之節固當若是
以茲千賞實爲包羞昔漢祖仗義而西滅秦項韓彭諸將
異姓同封然而德薄位崇卒見傾覆以臣智畧敢方先賢
苟或受之其能自保力微任重福過災生俛仰增憂心魂
若勵乞停嚴令俯遂私情儻聖澤旁流天光曲照俾從散
秩得齒周行臣之至願死將不朽無任懇迫之至

爲王仲昇謝加兵馬使表

臣某言伏奉今日制書授臣元帥左廂兵馬使兼知滑州兵馬使恭承寵命祇懼兼深臣某中謝臣聞至理之代爲官擇人故能謨謀有成授受惟允若才不稱職任非其能冒進求榮必貽禍敗伏惟寶應元聖文武皇帝陛下道齊濬哲德邁徇齊惟新景命再造區宇微臣薄劣早荷恩私慙無樽俎之謀累忝腹心之寄擁旄仗鉞自北徂南未翦兇渠已嗟挫慙守節雖同於蘇武喪師有類於孟明議以刑章分從釐粉陛下察其本志念臣微忠特全要領再

加驅策位兼風憲職典禁兵撫已循涯實爲塵忝每思陳力之誠竊懼妨賢之責不謂更沐殊恩猥當重任佐皇太子元戎之律統王畿御侮之權內省凡庸必多敗事乞停新命別授時英則朝章式序軍政無闕臣無任云云

爲郭令公謝一子三品官表

臣某言伏奉二月二十一日恩制敕賜臣一子三品之官并階鴻私曲臨魂守飛越臣其中謝臣聞祿位之設以待勲賢苟非其人必貽伊咎臣之弱子未有令聞方且勵以義方教之詩禮遽承殊澤特授崇班非唯有黷朝章名器

難假實亦懼招官謗顛沛爲憂寤寐兢惶罔知攸處況臣
榮登上相任重總戎子弟數人盡居右職過亢之誠切在
於心常懷棟撓之災寧忘屋漏之媿乞停寵命俯遂愚衷
庶幼童無冒進之嫌微臣有知足之誼無任感懼屏營之
至

爲文武百僚謝示周易鏡圖表

臣等某言某日開府魚朝恩以所造周易鏡圖於中書門
下奉宣聖旨傳示臣等仰觀易象遠見天心捧對循環載
欣載躍臣某中謝臣聞太極旣立是生兩儀六書以畫卦

四營而成易備君臣父子之道盡陰陽變化之原理亂吉凶必以類應自古哲后曾未研精爰及近臣莫聞訓習而朝恩深窮損益績以成圖陛下重有激揚示之於外臣幽觀妙用周覽元言警誡人君恢張治道陛下欲成其政必在勤而行之儻能建中於人實亦天下幸甚臣無任

爲郭令公謝臘日賜香藥表

臣某言月日中使某至伏奉恩旨敕賜臣臘日香藥金花銀合子兩枚面脂一盒裏香二袋澡豆一袋者開奩氣馥拜蹈增慚臣某中謝伏以時當大蜡節號嘉平歡已洽於

人神賜仍出於黻冕沐茲芳澤傳以香蘇忖陋體而何幸
顧顏齡而可駐邱山施重雨露恩深感戴慙惶不知所報
無任荷恩稠疊之至

謝賜新曆日及口脂面藥等表

臣某言中使某至伏奉某月日墨詔賜臣新曆日一通并
口脂面藥紅雪紫雪等窮溟之上寵詔忽臨大蜡之辰慶
賜爰及跪承慈渥戰汗失容臣往塵近掖實曠天心泊守
遐藩多昧戎畧殊私未答官謗將營陛下聖德包荒宸嚴
曲貸猶存寵任便浹恩波覆燾不遺於遐陬賜賚亟霑於

尸素況日官頒歷承敬授之規綸旨宣慈沐逾涯之獎蘭
膏滋潤絳雪珍芳捧持而炎瘴自消潤飾而衰容坐變邱
山非重草芥至微雖百其身豈酬鴻造無任感恩瞻戀之
至

謝黑詔賜歷日口脂表

臣某言伏奉月日墨詔等恩波遠被寵賜薦臨捧持傾心
跼蹐無據臣某中謝臣分麾五嶺謬竊殊榮莅鎮三年毫
無績效陛下不遺舊齒猶獎非才恩禮浹於遐藩慶賜覃
於令節天心宏覆慈旨優醲頒聖歷以授時降寵恩而撫

俗薰風溥暢陽景照臨輝華遍於草木忭舞盈於路衢蘭
膏絳雪沐雨露之湛恩陋質凡姿荷乾坤之厚施伏以三
元在近國度維新百辟獻芹獨馳心而望闕二毛垂領唯
懇願以朝天犬馬微誠感戀逾切無任感恩戀主屏營之
至

爲田神玉謝端午物表

臣某言中使某至賜臣母趙國太夫人手詔並衣一副銀
碗一事百索十軸兼賜臣敕書及手詔並衣一副銀碗一
事百索十軸又賜將軍等衣共五副百索共二十軸者聖

慈稠疊感戴無階臣某中謝臣恭守舊規謬知重務功慚
毫髮寵荷邱山滿篋詔書偏承睿顧傾家服玩皆自天來
叶彼良時旌其益壽淮南藥碗對此殊輕漢帝露盤方斯
匪重索盈千縷衣備五時雨露恩深不遺於老母乾坤施
廣遍及於下臣受賜若驚銜恩載躍誓當戮力祇奉威靈
縱有百身何階報效無任感恩

代郭令公請雪裴僕射表

臣某言臣聞忠邪不可以並立善惡不可以同羣吳任宰
嚮而伍胥鴟夷楚任靳尚而屈原放逐遠惟前事孰不痛

心伏見澧州刺史裴冕明允忠肅道高德厚匪躬無怠有
謇諤之風首佐先帝驅馳靈武贊雲雷之業成社稷之勲
程元振忌其直道剛方遂加誣構貶謫荒裔天下稱冤空
懷醜正之悲莫雪盜憎之恥今姦邪屏退聖政文明百度
惟貞四門已穆而寰海之內元元之人莫不延首德音思
聞至化伏願特令追冕列在朝廷俾之台座端揆庶僚平
章百姓處訏謨之任當燮理之權必能協和萬邦致君堯
舜臣位兼將相職忝股肱竊思賢傑共熙帝載無任懇迫
之至

代郭令公請雪安思順表

臣某言臣聞邵宛之死罪由無極申侯之戮譖起濤塗惡直醜正其來自遠伏見故開府儀同三司兼工部尚書安思順并弟羽林軍大將軍兼太僕卿元真等竭心聖代宣力先朝或任重疆場或寄深環列刈單于之壘殿天子之邦播算竹帛圖形文素旣稱名將實爲勲臣哥舒翰與之不叶因謀陷害云共祿山通應兄弟盡受誅夷冤痛之心歿而猶在安祿山牧羊小醜本實姓康遠自北番來投中夏思順亡父波主哀其孤賤收在門闌比至成立假之姓

氏及祿山擁旄薊北思順授鉞朔方雖則兄弟而情非黨
與祿山未反之日思順屢已陳聞朝廷百僚無不委悉豈
意姦人罔上成此盜憎生爲盡節之臣死爲銜冤之鬼趙
母以先請免坐思順以變告覆宗死而有知飲恨何極伏
惟陛下以至聖之德紹休帝圖蕩定妖氛肅清寰海軫納
隍之念深解網之仁陷賊衣冠咸蒙齒列豈令思順兄弟
獨隔恩私忠義之臣所爲流涕此臣所以特祈昭洗昧死
上聞但雪此一家必萬方感惠何則逝者抱屈尚蒙見申
則存者謀安故無冤濫雖有不賓之俗將聞風而悅服蓄

疑之將當委質而來朝豈惟天下歸仁實亦幽明欽德無任懇願之至

上代宗書

天道三十年一小變六十年一大變祿山思明之難出入二紀多難漸平向之亂今將變而之治宜建徽號承天意而方謁郊廟大赦各士誠恐雲雨之施未普鬱結之氣未除願因此時修享獻郊廟裒有德錄賢人與天下更始振災益壽之術也

上中書張舍人書

某白一昨猥辱面奉徵及玫瑰敝廬所有敢不供上輒獻
數本惟恕其非多此物常開花明媚可置之近砌芳香滿
庭雖萱草忘憂合歡蠲忿無以尚也夫花卉以明媚芳香
之故閣下不憚煩以採掇則士之有才有藝者必將盡力
而搜求人人相賀皆有望於明公矣某猶慮花卉移植之
際或有天閼其生詢樹藝之叟求長養之術叟曰以吾鄙
見先務及時第能當春徙之度地居之順其陰陽遂其成
性根莖未固擁之以沃土枝葉未茂漑之以寒泉則扶疎
鬱映紅芳可得而翫矣觀叟所爲其理信然某誠以臃腫

之姿願附於玫瑰之末擁土漑泉非明公而誰良時在茲
無或遐棄不宣某頓首

唐故同州河西縣丞贈虢州刺史太常卿天水趙

公神道碑

并序

惟天水趙公諱叡沖公惟隋員外散騎常侍平東將軍渭
源公顯和之元孫開府儀同三司博州刺史世立之曾孫
皇朝監察御史君煦之孫號王府法曹參軍徵之子自渭
源四代咸著清德洎公纂承嘉聞益彰志業貞簡形儀朗
異以孝友謹敬協柔昆弟以義禮誠純接奉朋交文蔚行

茂顯于當世天后時應明堂大禮科上異其對授陝州陝
縣尉轉汾州平遙尉囂劇之地以幹敏稱秩滿從調吏部
侍郎蕭至忠以公所試超等授大理評事公迫於祿養請
署同州河西丞贊貳其政昨輯吏肅劇賊遁逋伏姦不興
縣六百石郡二千石皆受成仰辦而已道長運速奄忽遷
殂以景雲二年冬十月二旬有一日終于縣館享年五十
二及夫人平陽敬氏卒以開元廿四年四月廿一日合祔
于虞鄉縣五老原初公寢疾告其二子良器良弼曰吾祖
成季宣孟忠勲炳著迨漢吏部尚書融晉黃門侍郎允亦

能勦攘寇難捍衛王室二祖皆爲河東守子孫因徙家焉
由魏歷隋位與時昇爾後仕唐三葉而未登吉祿以吾祖
宗之福豐慶演固不當湮抑淪廢意爾曹爾嗣其將必有
達人洎公即世適三十歲而良器官至中書舍人未五十
歲而良弼官至陝華等七州刺史御史中丞浙東嶺南兩
道節度使太子賓客元宗朝以嗣子參掌綸誥追贈公號
州刺史夫人平陽郡太夫人肅宗朝以次子節制方面累
贈公太常卿今聖踐極嗣孫密邕薰復縱袞等咸擅才業
宦成三署竟如公疇昔之所識於戲趙氏再世昌茂克大

其門皆號州祇奉先軌貽裕後續仁積訓深之所致也宜
其誕受光飾享茲徽章敢篆石立表紀旌風烈銘曰

德積於微業成而彰先時蹇舛允羨其昌於烈趙公亶惟
貞良砥修行學顯茂家邦施子及孫再世以光登朝就烈
佩玉鏘鏘澤浚本根沃潤黃腸有苾遺風久逾馨香於斯
篆刻裕美無疆